

重阳的诗

1.
冉冉秋光留不住，满阶红叶暮。又是过重阳，台榭登临处，茱萸香坠。
紫菊气，飘庭户，晚烟笼细雨。雍雍新雁咽寒声，愁恨年年长相似。——唐·李煜《谢新恩·冉冉秋光留不住》
2.
九月九日望乡台，他席他乡送客杯。人情已厌南中苦，鸿雁那从北地来。
——唐·王勃《蜀中九日》
3.
晚岁登门最不才，萧萧华发映金罍。不堪丞相延东阁，闲伴诸儒老曲台。
佳节久从愁里过，壮心偶傍醉中来。暮归冲雨寒无睡，自把新诗百遍开。
——宋·苏洵《九日和韩魏公》
4.
秋晚佳晨重物华，高台复帐驻鸣笳。邀欢任落风前帽，促饮争吹酒上花。
溪态澄明初雨毕，日痕清淡不成霞。白头太守真愚甚，满插茱萸望辟邪。
——宋·宋祁《九日置酒》
5.
九日黄花酒，登高会昔闻。霜威逐亚相，杀气傍中军。横笛惊征雁，娇歌落塞云。
边头幸无事，醉舞荷吾君。——唐·岑参《奉陪封大夫九日登高》
6.
山远翠眉长。高处凄凉。菊花清瘦杜秋娘。净洗绿杯牵露井，聊荐幽香。
乌帽压吴霜。风力偏狂。一年佳节过西厢。秋色雁声愁几许，都在斜阳。
——宋·吴文英《浪淘沙·山远翠眉长》

7.
满园花菊郁金黄，中有孤丛色似霜。还似今朝歌酒席，白头翁入少年场。
——唐·白居易《重阳席上赋白菊》

8.
九日龙山饮，黄花笑逐臣。醉看风落帽，舞爱月留人。——唐·李白《九日龙山歌》

9.
昨日登高罢，今朝更举觞。菊花何太苦，遭此两重阳。——唐·李白《九月十日即事》

10.
萸庭萧瑟故人稀，何处登高且送归。今日暂同芳菊酒，明朝应作断蓬飞。
——唐·王之涣《九日送别》

11.
老去悲秋强自宽，兴来今日尽君欢。羞将短发还吹帽，笑倩旁人为正冠。
蓝水远从千涧落，玉山高并两峰寒。明年此会知谁健？醉把茱萸仔细看。
——唐·杜甫《九日蓝田崔氏庄》

12.
独在异乡为异客，每逢佳节倍思亲。遥知兄弟登高处，遍插茱萸少一人。
——唐·王维《九月九日忆山东兄弟》

13.
秋豫凝仙览，宸游转翠华。呼鹰下鸟路，戏马出龙沙。紫菊宜新寿，丹萸辟旧邪。
须陪长久宴，岁岁奉吹花。——唐·赵彦昭《奉和九日幸临渭亭登高应制》

14.
薄雾浓云愁永昼，瑞脑消金兽。佳节又重阳，玉枕纱厨，半夜凉初透。
东篱把酒黄昏后，有暗香盈袖。莫道不销魂，帘卷西风，人比黄花瘦。
——宋·李清照《醉花阴·薄雾浓云愁永昼》

15.

深秋绝塞谁相忆，木叶萧萧。乡路迢迢。六曲屏山和梦遥。佳时倍惜风光别，不为登高。只觉魂销。南雁归时更寂寥。——清·纳兰性德《采桑子九日》

16.

重阳初启节，无射正飞灰。寂寞风蝉至，连翩霜雁来。山棠红叶下，岸菊紫花开。今日桓公座，多愧孟嘉才。——唐·阴行先《和张燕公湘中九日登高》

17.

今日云景好，水绿秋山明。携壶酌流霞，搴菊泛寒荣。地远松石古，风扬弦管清。窥觞照欢颜，独笑还自倾。落帽醉山月，空歌怀友生。——唐·李白《九日》

18.

江涵秋影雁初飞，与客携壶上翠微。尘世难逢开口笑，菊花须插满头归。但将酩酊酬佳节，不用登临恨落晖。古往今来只如此，牛山何必独沾衣。——唐·杜牧《九日齐山登高》

19.

重九开秋节，得一动宸仪。金风飘菊蕊，玉露泫萸枝。睿览八纮外，天文七曜披。临深应在即，居高岂忘危。——唐·韦安石《奉和九日幸临渭亭登高应制得枝字》

20.

汉文皇帝有高台，此日登临曙色开。三晋云山皆北向，二陵风雨自东来。关门令尹谁能识，河上仙翁去不回。且欲近寻彭泽宰，陶然共醉菊花杯。——唐·崔曙《九日登望仙台呈刘明府》

本文链接：<https://duanjuziku.com/duanjuzi/p4s3846gnf.html>